

## Uangalizi wa Mchungaji

*Naye akiisha kumwona, humweka mabegani pake akifurahi.*—Luka 15:5.

**K**atika kuwapatia agizo la utume wanafunzi Wake, Kristo si tu kwamba alielezea kazi yao, bali aliwapatia ujumbe wao. Alisema, “mkiwafundisha kuyashika yote niliyowaamuru ninyi.” Wanafunzi walipaswa kufundisha yale ambayo Kristo alifundisha. Yale aliyosema, si tu alipokuwepo Yeye Mwenyewe, bali pia kupitia kwa manabii na walimu wote katika Agano la Kale, yanajumuishwa hapa. Mafundisho ya wanadamu yamefungiwa nje. Hakuna nafasi ya mapokeo, nadharia na mawazo ya watu, au sheria zilizopitishwa na mamlaka za kidini. Hakuna sheria zilizoamriwa na mamlaka ya kikasisi ambazo zimejumuishwa katika agizo la utume. Hakuna kati ya haya ambayo watumishi wa Mungu wanapaswa kufundisha. “Torati na manabii,” pamoja na kumbukumbu za maneno na matendo Yake Mwenyewe, ndiyo hazina waliyopewa wanafunzi inayopaswa kupelekwa kwa ulimwengu. Jina la Kristo ndilo kauli mbiu yao, nembo yao ya upekee, kifungo chao cha umoja, mamlaka kwa ajili ya matendo yao, na chanzo cha mafanikio yao. Hakuna kitu ambacho hakibebi Neno Lake ambacho kitatambuliwa katika ufalme Wake.

Injili isitolewe kama nadharia ambayo haina uhai, bali kama nguvu iliyo hai na yenye kubadilisha maisha ya watu. Mungu anatamani kwamba wapokeaji wa neema Yake wawe mashahidi wa nguvu zake. Wale waliokuwa wanaishi maisha yanayomchukiza Mungu Yeye huwakubali; pale wanapotubu Yeye huwajaza Roho Wake Mtakatifu, huwaweka katika nafasi za majukumu makubwa, na kuwatuma katika mahali pa watu waasi ili watangaze rehema Zake zisizo na kikomo. Anawataka watumishi Wake wabebe ushuhuda kulingana na ukweli kwamba kwa njia ya neema Yake watu wanaweza kuwa na tabia ya Kristo, na wanaweza kufurahi katika uhakika wa upendo Wake mkuu. Anatutaka tubebe ushuhuda kulingana na ukweli kwamba hawezi kuridhika hadi wanadamu wamerejeshwa na kuwekwa katika haki zao takatifu kama wana na binti Zake.

Katika Kristo kuna upole wa mchungaji, upendo wa mzazi, na neema isiyokuwa na kifani ya Mwokozi mwenye huruma. Baraka Zake anazitoa kwa namna ya kuvutia zaidi. Hatosheki kutangaza baraka hizi tu; bali buzitoa kwa njia ile ipendezayo inayowavutia watu kuipata. Kwa hiyo watumishi Wake watangaze utajiri wa Kipawa hiki kisicho na kifani. Upendo wa Yesu wa ajabu utalainisha na kutiisha mioyo ya watu wakati ambapo kuyarudiarudia mafundisho hakutafanikisha lolote.... Kristo anahitaji kuonekana katika kila mfuasi Wake. Kila mtu Mungu amemkusudia awe “amefananishwa na mfano wa Mwana Wake” (Warumi 8:29). Ndani ya kila mtu upendo wa Kristo wenye uvumilivu mwingi, utakatifu Wake, upole Wake, rehema Zake, na kweli Yake vinapaswa kudhihirishwa kwa ulimwengu

(Tumaini la Vizazi Vyote, seh. ya 2, uk. 438, 439).